

Allagaateqarfeqarneq pillugu Inatsisartut inatsisaannik Namminersorlutik oqartussat nalunaarutaat

Matumuuna nalunaarutigineqarpoq allagaateqarfeqarneq pillugu Inatsisartut inatsisaat nr. 5, 3. juni 2015-imeersoq, allannguuteqarluni Inatsisartut inatsisaat nr. 34, 28. november 2019-imeersup malitsigisaanik.

Kapitali 1

Inatsisartut inatsisaata atuuffissaa

§ 1. Inatsisartut inatsisaat Namminersorlutik Oqartussani Kalaallit Nunaannilu kommunini ingerlatsivinnut tamanut atuuppoq.

Imm. 2. Naalakkersuisut maleruagassatigut aalajangersarsinnaavaat Inatsisartut inatsisaat tamakkiisumik ilaannakortumilluunniit atortuussasoq ingerlatseqatigiiffinnut, suliffeqarfinnut il.il. erseqqinnerusumik taaneqartunut pisortat ingerlatsinerannut naatsorsuunneqarsinnaanngitsunut. Aatsaalli taamaattoqartassaaq sulinerminni aningaasartuutaat tamarmik amerlanersaalluunniit pisortanit akilernerqartarpata imaluunniit Inatsisartut inatsisaat imaluunniit peqqussut naapertorlugu pisortat sinnerlugit aalajangiinissaminut pisinnaatitaaffilerneqarsimappata.

Imm. 3. Oqartussaqrarfiit, sullissiveqarfiit, ingerlatseqatigiiffiit, peqatigiiffiit il.il. imm. 1-2-lu ilaatinneqartut tulluittuni pisortat sullissiveqarfiisut taagorneqassapput.

Imm. 4. Pissutsit Inatsisartut aamma oqartussaaffeqarfiit suliffeqarfiillu tassunga atasut allagaateqarfinut tunngasut pillugit maleruagassat Inatsisartut siulittaasoqarfiannit aalajangersarneqassapput Naalakkersuisut isumaqatiginiareerlugit.

Imm. 5. Inatsisartut inatsisaanni kapitali 6, inunnit ataasiakkaanit aamma sullissiveqarfinnit, ingerlatseqatigiiffinnit, peqatigiiffinnit il.il. toqqortanut imm. 1-2-mi ilaanngitsunut (namminerisamik toqqortat) atuuppoq.

§ 2. Naalakkersuisut inatsit malillugu suliassat suliarineqartarnerat pillugu naalagaaffimmi oqartussanut, naalagaaffimmi oqartussaasut sullissiveqarfinut Kalaallit Nunaanniittunut tunngatillugu isumaqatigiissuteqarsinnaapput.

Kapitali 2

Nunatta Katersugaasivia Allagaateqarfialu

§ 3. Nunatta Katersugaasivia Allagaateqarfialu toqqortat oqaluttuarisaanermi nalillit imaluunniit innuttaasunut oqartussaasunullu allaffissornikkut inatsisitigulluunniit pissutsinut uppersaatsissat atuuttut toqqortarineqarnissaasa qularnaarneqarnissaat pisortat sullissiveqarfutaasa toqqorsiviiniittut aammalu kapitali 6-imi aalajangersakkat naapertorlugit inuit namminerisamik toqqortaataasa katersorneqarnissaannut, aqqissuunneqarnissaannut, toqqortarineqarnissaannut nalunaarsorneqarnissaannullu akisussaavoq.

Imm. 2. Nunatta Katersugaasivia Allagaateqarfialu toqqortat pissarsiarineqartut aallaavigalugit ilisimatusarnermik ingerlatsissaaq kiisalu Kalaallit Nunaanni porsarsimassutsikkut inuiaqatigiillu oqaluttuarisaanikkut ineriartornerannik ilisimanninneq siaruartissallugu.

Imm. 3. Nunatta Katersugaasivia Allagaateqarfialu toqqorsiveqarnermut tunngasutigut porsarsimassutsikkut sullissiveqarfinnik allanik Nunatsinniittunik avataaniittunillu siunnersuisassaaq suleqateqartassallunilu.

§ 4. Nunatta Katersugaasivia Allagaateqarfialu pisortat sullissiveqarfinut toqqorsiveqarnermut tunngasutigut siunnersuisassaaq.

Imm. 2. Nunatta Katersugaasivia Allagaateqarfialu pisortat sullissiveqarfutaasa toqqortaataasa suliarineqartarnerannik toqqortarineqartarnerannillu nakkutilliisuussaaq.

Kapitali 3

Pisortat sullissiveqarfutaasa toqqorsiveqarnerannut tunngasut

Toqqorta qarnek

§ 5. Suulluunniit paasissutissartallit pisortat sullissiveqarfiini sulinikkut pilersinneqartut taakkuluunniit aqutugalugit pilersinneqartut toqqorneqassapput.

§ 6. Pisortat sullissiveqarfutaasa, toqqortaamik qaqugukkulluunniit isumannaatsumik suliarineqarnissaat toqqortarineqarnissaallu isumagissavaat. Elektroniskimik toqqortat suliarineqassapput toqqorneqarlutillu Nunatta Katersugaasiviata Allagaateqarfialu atortulersuummi akuerisaani, taakkulu qarasaasiamut toqqorsiviusumut millisillugit nuunneqarsinnaassapput.

Imm. 2. Pisortat sullissiveqarfutaasa toqqortatik pisortat sullissiveqarfiisa allat toqqortaataannit immikkoortissavaat, taamaattoq tak. imm. 3.

Imm. 3. Naalakkersuisut aalajangersinnaavaat, Inatsisartut inatsisaat atsiukkat siullerpaat, Inatsisartut peqqussutaat, Namminersornerullutik Oqartussat aamma Namminersorlulik Oqartussat peqqussutaat kiisalu kommunit ileqqoreqqusaat, toqqorsiveqarfiup toqqagaani toqqorsivimmi toqqortaatineqassasut.

§ 7. Pisortat sullissiveqarfata suliassaqarfiisa pisortat sullissiveqarfiannut allamut nuunneqarneranni, toqqortat sulianut inaarneqanngitsunut tunngassuteqartut pisortat sullissiveqarfutaannut suliassaqarfinnik tiguisumut nuunneqartassapput.

Imm. 2. Toqqortat allat Nunatta Katersugaasivianut Allagaateqarfiannullu nuunneqarnissamik tungaanut pisortat sullissiveqarfutaanni nuussisumiiginnartassapput, tak. § 12. Toqqortat taamaattut pisortat sullissiveqarfutaannut tiguisumut nuunneqartarnissaat Nunatta Katersugaasiviata Allagaateqarfialu

pisuni immikkut ittuni akuerisinnaavaa.

Imm. 3. § 6, imm. 2-imi aalajangersagaq aamma atuutissaaq imm. 1 aamma 2 naapertorlugit toqqortaatini nuussisoqarnerani.

§ 8. Naalakkersuisut pisortat sullissiveqarfutaasa toqqortaatiniq suliarinnittarnerat toqqortarinnittarnerallu pillugit erseqqinnerusunik maleruagassiussapput. Kommunini ingerlatsiviit toqqortaatiniq suliarinnittarnerat toqqortaqartarnerallu pillugit maleruagassat aamma kommuninut isumaqatiginninniareernikkut aalajangersarneqassapput.

§ 8 a. Nunatta Katersugaasiviata Allagaateqarfialu pigisanik, Inunnut paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu peqqussummut ilaasunik, toqqortarinnittarnera pillugu ersarinnerusunik maleruagassanik, Datatilsyn-imit oqaaseqaammik pissarsinerup kingorna, Naalakkersuisut aalajangersaasinnaapput.

Allanut tunniussineq

§ 9. Pisortat sullissiveqarfutaasa toqqortataat allanut tunniunneqassanngillat aammalu eqqartuussiviit aqqutigalugit piginnittussaajunnaarsitsinikkut piginnittussaasulluuniit akuersissutigineqarneratigut pissarsiarineqarsinnaanngillat.

Imm. 2. Pisortat sullissiveqarfutaasa toqqortataat inunnit ataasiakkaanit pigineqalersimappata akiliutitaqanngitsumik Nunatta Katersugaasivianut Allagaateqarfianullu utertinneqartassapput.

Toqqorsiveqarnermut allakkanillu nalunaarsuiffeqarnermut pilersaarutit

§ 10. Naalakkersuisut toqqorsiveqarnermut allakkanillu nalunaarsuiffeqarnermut pilersaarutit pillugit maleruagassat erseqqinnerusut, Nunatta Katersugaasiviata Allagaateqarfialu tamatuminnga inassuteqarneratigut aalajangersassavaat. Kommunini ingerlatsiviit toqqorsiveqarnermut allakkanillu nalunaarsuiffeqarnermut pilersaarutiniq suliaqartarnissaat pillugu maleruagassat aamma kommuninut isumaqatiginninniareernikkut aalajangersarneqassapput.

Atortussaajunnaarsitsineq

§ 11. Naalakkersuisut toqqortat toqqortarineqartussaannngitsut, atortussaajunnaarsitsisarneq pillugu maleruagassaliorsinnaapput, Nunatta Katersugaasiviata Allagaateqarfialu tamatuminnga inassuteqareerneratigut.

Imm. 2. Toqqortat atortussaajunnaarsitassanngortinneqaraangata toqqortat susassaqanngitsunit takuneqarsinnaajunnaarlugit aserorterneqarnissaat pisortat sullissiveqarfutaata isumagisassaraa.

Kapitali 4

Toqqortaatiniq tunniussineq

§ 12. Toqqortaatit ukiunit 15-init pisoqaanerusut pisortallu sullissiveqarfutaata sulinerani atortussaajunnaartut, kinguarsarnertaqanngitsumik Nunatta Katersugaasivianut Allagaateqarfianullu tunniunneqassapput. Pisuni immikkut ittuni aamma Nunatta Katersugaasivianut Allagaateqarfianullu isumaqatigiissuteqarnikkut tunniussineq piffissami allami pisinnaavoq. Piffissami allami tunniussisoqassappat tamanna Nunatta Katersugaasivianit Allagaateqarfianiillu qinnuiginninneq malillugu pissaaq.

Imm. 2. Tunniussinissap tungaanut pisortat sullissiveqarfutaat toqqortaatiminik toqqortarinninnissaminut pisussaapput.

Imm. 3. Pisortat sullissiveqarfutaat atortussaajunnaarsinneqarpat taassuma toqqortaataasa pisoqaassusaat apeqqutaatinnagu tunniunneqartassapput, pisortat sullissiveqarfutaannit allami suliaasaqarfimmik tiguisissusami atorineqassanngikkunik, tak. § 7.

§ 13. Toqqortat tunniunneqarnerminni torersarneqarsimassapput, poortorneqarsimallutik, nalunaaqutserneqarlutik qulequtsersorneqarsimassallutillu aammalu suliat ataasiakkaat pisariaqanngitsortaat peerneqarsimassallutik.

Imm. 2. Nunatta Katersugaasiviana Allagaateqarfiala inassuteqarnerata aamma Datatilsyn-imit oqaaseqaammik pissarsinerup kingorna, matumani elektroniskimik toqqortat ilanngullugit, Inunnut paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu peqqussummut ilaasunik toqqorneqartussanillu, toqqorneqartussanik tiguisarneq pillugu ersarinnerusunik maleruagassanik Naalakkersuisut aalajangersaasinnaapput.

Imm. 3. Pisortat sullissiveqarfutaat tunniussisoq tunniussinermi aningaasartuutinik tamanik akiliissaaq.

§ 14. Pisortat suliffeqarfutaata attartorlugit angerlaakkallarsinnaavai nammineq allagaatit toqqortaatigineqalersut, sulianut atatillugu atorummallugit, tak. taamaattoq § 21 c.

§ 14 a. Pisortatut oqartussaasoq kinaluunniit siusinnerusukkut maannakkulluunniit pisortatut oqartussaasunit toqqortaatigineqarsimasunik tigusaqaruni pissarsiaqaruniluunniit, tamanna pillugu Nunatta Katersugaasivianut Allagaateqarfianullu ingerlaannartumik nalunaaruteqassaaq. Toqqortaatini taama ittunik oqartussaasut neqeroorfigineqarunik imaluunniit toqqortaatip piunera pillugu arlaatigut ilisimasaqalerunik taamatuttaaq Nunatta Katersugaasivianut Allagaateqarfianullu tamanna pillugu ingerlaannartumik nalunaaruteqassapput.

Kapitali 5

Pissarsiarineqarsinnaanerat atorineqarnerallu

Tamanit pissarsiarineqarsinnaanerat

§ 15. Toqqortat Nunatta Katersugaasivianut Allagaateqarfianullu tunniunneqartut ukiunik 25-inik pisoqaassuseqaleraangamik tamanit pissarsiarineqarsinnaalersarput, taamaattoq tak. §§ 16-17.

§ 16. Toqqortat inuit ataasiakkaat pillugit paasisutissartallit, tassunga ilanngullugit aningaasaqarnerannut tunngasut, pissarsiarineqarsinnaanerat ukiunut 80-inut killilernerqarpoq.

§ 17. Pisortat inuilluunniit ataasiakkaat soqutigisaat pingaarutilitsigut eqqarsaatigineqartariaqarpata pisortat sullissiveqarfutaat tunniussisuusoq, Nunatta Katersugaasivianik Allagaateqarfianillu oqaloqateqareernermigut §-ini 15-imi 16-imilu pissarsiarineqarsinnaanerannut killiliunneqartumit sivilunerusumik killiliisinnaavoq.

Imm. 2. Imm. 1 naapertorlugu pissarsiarineqarsinnaassusianut killiliussaq tunniussinermi aalajangerneqartassaaq toqqortaatinullu sorlernut imaluunniit toqqortaatinut ataatsimoortunut sorlernut killiliussap tunnganerani erseqqinnerusunik imaqaassalluni.

§ 18. Toqqortaatit naalagaaffimmi oqartussaneersut immikkut isumaqatigiissuteqarluni, tak. § 2, Nunatta Katersugaasivianut Allagaateqarfianullu tunniunneqartut pissarsiarineqarsinnaanerannut killissarititaasut isumaqatigiissummi aalajangiunneqartut atuupput.

§ 19. §§-it 15-imiit 18-imut naapertorlugit pissarsiarineqarsinnaanerannut killissarititat toqqortaatigineqartup ukiumi toqqorneqarfianit naatsorsorneqassapput.

§ 19 a. Toqqortaatit tamanit pissarsiarineqarsinnaanngitsut, pissarsiarineqarsinnaanerat pillugu ersarinnerusunik maleruagassanik Naalakkersuisut aalajangersaasinnaapput

Immikkut akuersissuteqartarnej

§ 20. Toqqortat ilisimatusarnermut atornejassappata Nunatta Katersugaasivia Allagaateqarfialu §§-ini 15-imiit 17-imut aalajangersakkat atortinneqannginnissaannik immikkut akuersissuteqarsinnaavoq, taamaattoq tak. imm. 2.

Imm. 2. Toqqortat § 17, imm. 1-imi aalajangersakkamit pissarsiarineqarsinnaanerat sivilunerusumik killilerlugu isumaqatigiissutit atornejarnissaannut immikkut akuersissuteqartoqartinnagu pisortat sullissiveqarfutaannit tunniussisumit akuersissummik pissarseqqaartoqartassaaq.

Imm. 3. Immikkut akuersissuteqarnej inuit ataasiakkaat ataqqisariaqarnerata unioqqutinneqannginnissaanik piumasaqaatitaqartassaaq.

Atorneqartarnerat

§ 21. Toqqortat §§-ini 15-imiit 18-imut maleruagassat naapertorlugit pissarsiarineqarsinnaasut Nunatta Katersugaasiviani Allagaateqarfianilu atorneqarsinnaapput, taanna atuinermut ikiorsiullugu.

Imm. 2. Ilisimatusarnermut atugassaatillugit Nunatta Katersugaasiviata Allagaateqarfialu toqqortat atuagaateqarfinnut, katersugaasivinnut akuerisanut aamma sullissiveqarfinnut tamakku assingitut atukkiunneqarsinnaanerat akuersissutigisinnavaa. Nunatta Katersugaasivia Allagaateqarfialu atukkiussinermut atasumik piumasaqaateqarsinnaavoq.

§ 21 a. Nunatta Katersugaasiviata Allagaateqarfialu pisuni aalajangersimasuni allagaatinik, allagaatinik toqqorsivinniittunik ataatsimoortunik imaluunniit allagaatinik ataatsimoortunik toqqorsivinnik arlaqartunik ataatsimoortunik imaqtartunik Nunatta Katersugaasivianut Allagaateqarfianullu tunniunneqareersimasunik atuissamut akuersissut nalunaarutigisinnavaa, atuisinnaanermut piffissaliussaasup naannginnerani, tak. taamaattoq § 21 b aamma c.

§ 21 b. § 21 a malillugu akuersissut, oqartussaasup tunniussisup akuersineranik piumasaqaateqarpoq, imaassimappat

- 1) allagaatigineqartup imaluunniit toqqortaatigineqartup pissarsiarineqarsinnaaneranut piffissaliussaq § 17 malillugu aalajangersarneqartumit sivisuneruppat,
- 2) toqqortaatigineqartoq imaluunniit allagaatigineqartoq ukiunik 25-nik nutaaneruppat imaluunniit
- 3) toqqortaatigineqartoq naalagaaffimmi oqartussaasumit pissarsiarineqarsimappat, tak. § 18.

§ 21 c. § 21 a malillugu akuersissut Datatilsyn-imiit akuersissummik pisariaqartitsivoq, toqqortaatigineqartoq pisortat ingerlatsiviisa akornanni oqartussaasumit tunniunneqarsimappat aamma inunnut ataasiakkaanut inuttut atugaannut tunngasunik paasissutissanik imaqsarimappat aamma

- 1) paasissutissat siusinnerusukkut suliarineqarsimasut Inunnik paasissutissanik suliarinnittarneq pillugu inatsisip Kalaallit Nunaanni atuutilersinneqarnera pillugu peqqussummut ilaasimappata imaluunniit
- 2) paasissutissat qarasaasiakut-nalunaarsuiffimmit pissarsiarineqarsimappata, pisortat ingerlatsineranni suliarineqarsimasut.

§ 22. Toqqortaatinik tamanit takuneqarsinnaanngitsunik atuissaminut akuerineqartoq, taamaaliornermigullu paasissutissanik isertuussanik ilisimasaqalersoq akuerineqartinnani paasissutissanik isertuussanik tamanut saqqummiussissanngilaq, ingerlatitseqqissanani atuissananiluunniit.

§ 22 a. Paasissutissanik, Inunnut paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu peqqussummut ilaasunik, atornerinut piumasaqaatit pillugit maleruagassanik, Datatilsyn-imit oqaaseqaammik pissarsinerup kingorna, Naalakkersuisut aalajangersaasinnaapput.

§ 23. Nunatta Katersugaasiviata Allagaateqarfialu toqqortat atorineqarnissaat itigartitsissutigisinnavaa toqqortaatip toqqortarineqarnermini pissusia eqqarsaatigineqartariaqartillugu. Toqqortaatip toqqortarineqarnermini pissusia ajoqusernagu pissappat atuisussamut atugassanngorlugu assiliissummik assilillugu nuussisoqassaaq.

§ 24. Nunatta Katersugaasivia Allagaateqarfialu allagaatiminik ilisimatusarnermut aamma tamanut saqqummiussassatut akeqanngitsumik atugassanngortitsissaaq. Taamaattorli sullissinerit annertunerusut nukissanillu atuiffiusut akileqquneqarsinnaapput.

Kapitali 6

Inuit namminerisamik toqqortaataat

§ 25. Nunatta Katersugaasivia Allagaateqarfialu inunnit ataasiakkaanit, sullissiveqarfinnit, ingerlatseqatigiiffinnit, peqatigiiffinnit il.il., § 1, imm. 1-miit 2-mut ilaatinneqanngitsunit toqqortaatinik ilisimatusarnermut annertuumik imaluunniit nalinginnaasumik piorsarsimassusermut pingaaruteqartunik, katersisinnaavoq, tiguisinnaalluni isumannaarisinnaallunilu.

Imm. 2. Imm. 1 naapertorlugu toqqortaatinik tunniussisoq toqqortaatiq pissarsiarineqarsinnaaneranut killiliisimatinnagu, toqqortaatiq §§-ini 15-imiit 16-imut aammalu §§-ini 19-imiit 20-mut maleruagassat naapertorlugit pissarsiarineqarsinnaapput.

Imm. 3. Imm. 1-imi pineqartut atorineqarsinnaanerannik aalajangersaasoqarsimanngippat toqqortat §§-ini 21-miit 24-mut maleruagassat naapertorlugit atorineqarsinnaapput.

§ 26. Toqqortaatinik ilisimatusarnermut annertuumik imaluunniit nalinginnaasumik piorsarsimassusermut pingaarutilinnik namminerisaminik pigisaqartoq, toqqortat nunamit anninneqartinnagit toqqortaatiq Nunatta Katersugaasivianit Allagaateqarfianillu assilineqarnissaannut periarfissiisaaq.

Imm. 2. Naalakkersuisut Nunatta Katersugaasivia Allagaateqarfialu inassuteqartereerlugu toqqortaatiq namminerisamik pigineqartut annertuumillu ilisimatusarnermut imaluunniit nalinginnaasumik piorsarsimassusermut pingaaruteqartut killilersornissaat pillugit malittarisassaliorsinnaapput.

Kapitali 6 a

Paasissutissanik paasitinneqarnissamik qinnuteqaat, Inunnut paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu peqqussummut ilaasoq

§ 26 a. Paasissutissat Inunnut paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu peqqussummut ilaasut, Nunatta Katersugaasiviani Allagaateqarfianilu toqqortaatigineqartussatut nuunneqarsimasut, pillugit paasissutissanik pissarsitinneqarnissaq pillugu inuk kinaluunniit Nunatta Katersugaasivianut Allagaateqarfianullu qinnuteqaammik saqqummiussisinnaavoq.

Imm. 2. Imm. 1 malillugu qinnuteqaatiq, paasissutissanik taakkuninnga suliarinneqqaartuusimasoq, oqartussaasoq nalunaassavaa.

Imm. 3. Paasitinneqarnissaq pillugu qinnuteqaat tamanna pillugu Inunnut paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu peqqussummi aalajangersakkat malillugit oqartussaasumut pineqartumut aalajangiisussamut, Nunatta Katersugaasiviata Allagaateqarfialu ingerlateqqissavaa.

Imm. 4. Nunatta Katersugaasivianut Allagaateqarfianullu tunniunneqarsimasunik inuit namminneerlutik toqqortaataannik paasitinneqarnissaq pillugu qinnuteqartoqartillugu, Inunnut paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu peqqussummut ilaasunik, peqqussummi aalajangersakkat malillugit tamanna pillugu toqqortaasivik aalajangiisaaq. Qinnuteqaatiq paasissutissanut akisussaasuusoq, paasissutissanik pineqartunik suliarinneqqaartuusooq, nalunaassavaa.

Kapitali 7

Pineqaatissiinissamut aalajangersakkat

§ 27. § 5-imik, § 6, imm. 1-imik aamma 2-mik, § 7-imik, § 9, imm. 2-mik, § 11, imm. 2-mik, § 12-imik, § 13, imm. 1-imik, § 14 a-mik, § 22-mik aamma § 26-mik aamma § 21, imm. 2 naapertorlugu piumasaqaatinik aalajangersarneqarsimasunik unioqqutitsineq, Kalaallit Nunaanni pinerluttulerinermut inatsimmi maleruagassat malillugit akiliisitsinermik kinguneqaateqartinneqarsinnaavoq.

Imm. 2. Aalajangersakkanik unioqqutitsisoqartillugu akiliisitsisarnissaq pillugu maleruagassat maleruagqusanik Inatsisartut inatsisaat naapertorlugu atuutilersinneqartuni aalajangersarneqarsinnaapput.

Imm. 3. Akiliisitsinissaq Inatsisartut inatsisaatigut maleruagqusaniluunniit Inatsisartut inatsisaat naapertorlugu atuutilersinneqartutigut tunngavissaqarpas, inatsisit naapertorlugit inatsisitigut pisussaatisaasoq Kalaallit Nunaanni pinerluttulerinermik inatsimmi maleruagassat naapertorlugit akiliisitsissummik akileeqquneqarsinnaavoq.

Imm. 4. Inatsisartut inatsisaat manna atorlugu akiliisitsinerit nunatta karsiata pisassaraa.

Kapitali 8

Atuutilerfia ikaarsaariarnermilu aalajangersakkat

§ 28. Inatsisartut inatsisaat januaarip aallaqqaataani 2016-imi atuutilerpoq, taamaattoq § 8, § 10, § 11, imm. 1, § 13, imm. 2 aamma § 26, imm. 2 aggstip aallaqqaataani 2015-imi atuutilissapput.

Imm. 2. Tamatuma peqatigisaanik Allagaateqarfeqarneq pillugu Inatsisartut inatsisaat nr. 22, 30. oktober 1998-imeersoq atorunnaarpoq.

Imm. 3. Maleruagassat allaffissornikkulluunniit maleruagqusat Allagaateqarfeqarneq pillugu Inatsisartut inatsisaat nr. 22, 30. oktober 1998-imeersoq naapertorlugu aalajangersagaasut atuutsiinnarneqartulluunniit, Inatsisartut inatsisaat manna inatsisilluunniit allat naapertorlugit maleruagassanik allaffissornikkulluunniit maleruagqusanik taarserneqarnissartik tikillugu atuutiinnassapput.

Allagaateqarfeqarneq pillugu Inatsisartut inatsisaata allanngortinneqarnera pillugu Inatsisartut inatsisaat nr. 34, 28. november 2019-imeersoq (Toqqorsiveqarfiup toqqortaataani toqqartukkani allaaserineqaaqqaartut maleruagassat allaaserineqarsimasut toqqortarineqarnissaannut aamma toqqortat inuk pillugu paasissutissanik ilaqartut il.il. toqqortarineqartarnerannut, tunniunneqartarnerannut atorineqartarnerannullu tunngaviusussaq)[1] imannak atuutilersitsinermut aalajangersakkamik imaqarpoq:

§ 2

Inatsisartut inatsisaat manna ulloq 1. januar 2020-mi atuutilerpoq.

Imm. 2. Inatsisartut inatsisaat toqqortaatinut, Inatsisartut inatsisaata atuutilernera sioqqullugu oqartussaasup naammassisimasaanut imaluunniit pissarsiarisimasaanut aamma atuuppoq.

Ilinniartitaanermut, Kultureqarnermut Ilageeqarnermullu Naalakkersuisoqarfik, ulloq 4. februar 2020

Lone Nukaaraq Møller

/

Claus Kleemann

[\[1\]](#) Inatsimmi allannguneq § 1, imm. 2, § 6, § 8, oqaaseqatigiit aappaat, § 8 a, § 10, oqaaseqatigiit aappaat, § 12, imm. 1, § 13, imm. 2, § 14, § 14 a, § 19 a, § 21, imm. 2, § 21 a, § 21 b, § 21 c, § 22 a, § 26 a aamma § 27, imm. 1.-mut tunngasuupput.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut